

**LAAPPUNTO GALLASSA ADIVENTISTTE BAASO AMMANOTA**

Laappunto gallassaa bonchchiyaa adiventistteti Geesha maxafaa bantta ammanuwaassi baaso oottidi ekkiyaageeta gidishin amarida baaso ammanota (Tamaarisota) qassi ha Geeshsha maxaafaa timirteta giidi ekkoosona. Ha ammanoti ha xuufiyaan shiiqidoogaadan Woossiyoo keetteessi de'iyaa Geeshsha maxafaa akeekaanne birshshettaa qonccisoosona. Ha xuufeti Woossiyoo keettee salo gufantto yaa'an (General conference session) Geeshsha ayaanay woossiyoo keettiyoo kumetta Geeshsha maxaaffaa akeekaakko kaalettido keenan woykko Xoossaa xillo qaalaa timirteta kehiyaa qaalan qonccissanaadan maaddido keenan zaaretettana danddayoosona

<b>Ammanuwaa huuphe yohota &amp; Qorintata</b>	<b>Gastta asaassi</b>	<b>Guutta naatussi</b>
<p><b>1. Geeshsha Maxaafaa</b> 2Phexiroosa. 1:20-21, 2Ximootiyoosa. 3:16-17, Sabancha Dawita 119: 105, Leemiso. 30:5-6, Isiyaasa 8:20, Yohannisa 17:17, 1 Tasalonqqe 2:13, Ibrawe 4:12</p>	<p>Geesha Maxaafay, Gal'anne Ooratta maachchati, Xoossaa geeshsha asati Geeshsha ayaanan kaalettetidi haasayidonne Xaafido Ayaanaa qonccettan imettida xaafettida Xoossaa qaala. Ha qaalaa garssan Xoossay asa na'aassi attanaadan (paxanaadan) koshshiyaa eraa wottiis. Geeshsha maxaafay bali bayinna Xoossaa sheniyaa qonccetta. Hegaa gishashawu Geeshsha maxaafay likke gidida kandduwaa yiggiyoogaa, meeze ubbaa paacchiyoogaa, tamarissuwaa Godaa sheniyaan qonccisiyaagaanne ammananawu koshiyaa Taarika gidдон Xoossaa wogaa yootiyaagaa.</p>	<p>Geesha Maxaafay Xoossaa Maxaafaa. I nuussi kiittido kiitaa. Geeshsha maxaafaa garssan Xoossaa cenggurssay nuussi haasayishin siyeettes.</p>
<p><b>2. Silaasiyaa</b> Zedaagime 6: 4, Matiyoosa 28:19, 2Qorontoosa. 13:14, Efiisoonaa 4:4-6, 1Phexiroosa 1:2, 1Ximootiyoosa 1:17, Ajjuutaa 14:7</p>	<p>Issi Goday de'ees: - Aawaa, Na'aanne Xillo ayaanaa Heezzu merinawu de'iyaaageetu issippetettaa, Xoossay hayqqenna, ubbaa danddayiyaa, ubbabaa eriyaa, ubbaappe bollatiyaanne ubbatoo de'iyaaagaa. Merinawu de'iyaaanne asa guuggiyaan erettiyoogappe bolla gidiiddi ba oonatettaa I Xoossay immiyoo qonccettaa bagaara erissees. Xoossaassi merinawu meretetta ubbaa goynoy, yaynoynne hagaazoy assi bessees.</p>	<p>Goday asatettan heezza. Xoossaa Aawaa, Yesuusa (Aawaassi na'aa) nne Xillo ayaanaa. Ha heezzatu kanddoynne qofay issuwaa gidido gishshawu issi Goda oottidi ekeettes (Qooppeettes)</p>
<p><b>3. Aawaa</b> Shachcha 1:1, Ajjuutaa 4:11, 1Qorontoosa 15:28, Yohaannisa 3:16, 1Yohaannisa 4:8, 1Ximootiyoosa 1:17, Keesaabaa 34:6-7, Yohaannisa 14:9</p>	<p>Merinaa Goday Aaway meretetatta ubbaa medhida, pultto, ubbaa wottiyaanne haariyaagaa. Xillonne Geeshsha, Maariyaanne keha, hanquwaassi eesotenna, mino siiqoy de'iyoonne ammanttiyaa Godaa. Na'aaninne Geeshsha ayaanan qonccida oonatettatanne wolqqati ubbay qassi Aawaanikka hegaadaan qoncciyaageeta.</p>	<p>Aawaa Xoossaabaa wurssidi erokko. Gidikokka I nuna siiqiyooogaadan ereettes gaasoykka ba issi na'aa Yesuusa nuna ashshanaasi kiittiis.</p>
<p><b>4. Na'aa</b> Yohaannisa 1:1-3,14, Qolaasiyaasa 1:15-19,</p>	<p>Merinaa Goday Na'ay Yesuusi Kristoosan ashuwaa maayiis. Aani ubbabati merettidosona, Xoossaa kanddoy aani qoncciiis, asaa naatu atotettay aani poluwaa demmiis hegaadankka ha alamiyaa pirddettaasu. Merinawu polo tumanchcha goday</p>	<p>Aykeesaa Yesuusi Goda gidikokka ha sa'aa yiidi nuna ashshanawu asa gididiis. Nuuni</p>

<p>Yohaannisa 10:30, 14:9, Roome 6:23, 2Qorontoosa 5:17-19, Yohaannisa 5:22, Luqaasa 1:35, Filiphisiyuusa 2:5-11, Ibraawe 2:9-18, 1Qorontoosa 15:3-4, Ibraawe 8:1-2, Yohaannisa 14:1-3</p>	<p>polo tumanchcha asa gidiis. Yesuusi Geeshsha ayaanan shahaarettidi Geeshsha Mayriyaamippe yelettiis. Asa gididi ha biitten de”idi asadan paacettidaba gidikokka polo gidida meran Xoossaa xillotettaanne siiquwaa bessiiis. Maalaaliyaabaa oottiyoogan Xoossaa wolqqaa bessidaagaa gidishin Xoossan hidootay imettido ashiyaagaa i gidiyooagaan markkatettiis. Na”ay ba sheniyaan nu nagaraa gishshatawu nu gishshaa barchetiis hayqqiis, hayquwaappekka denddiis nu gishatawu saluwaa meqidessiyaan hagaazana gishawu saluwaa biis. Ba deriyaa polo goqatettawu kessanaassinne ubbabaa nagaran kunddanaappe kase de”iyoo hanotaassi zaaranawu qassi bonchuwaan yaanawu de”ees.</p>	<p>de”iyooagaan de”iis shin gidikokka poloppe nagara oottibeena. Yaatidi qassi nu nagaaraassi gi hayqqiis.</p>
<p><b>5. Xillo Ayaanaa</b> Shachcha 1:1-2, Luqaasa 1:35, 4:18, Hawaretu oosuwaa 10:38, 2Phexiroosa 1:21, 2Qorontoosa 3:18, Efesoonaa 4: 11,12, Hawaretu oosuwaa 1:8, Yohaannisa 14:16-18, 14:16, 15:26-27, 16:7-13</p>	<p>Merinaa Goday Xillo Ayaanay Aawaaranne Na”aara medhdhiyode, goday ashuwaa maayidinne nagaran kundida asa woziyoo oosotu gididon issippe de”ees. Geeshsha maaxaafaa Xaafidaageeta kaalettiis, Yesuusa de”uwaa wolqqan kunttiis. Asaa naata borees, baakko daafees. Ha siiqo dafuwaassi ishshi giyaa ubbaa ooraxissees Xoossaa malatanaadanka laammees. Ubba wode ba naatuura gidana mala Awaappenne Na”aappe kiitaa ayaanaa imotata woossiyoo keetteessi immees, Yesuusassi markka gidana mala woosa keettiyoo wolqqan kuntees, Geeshsha maxaafaaraa maayettida meran tuma ubbaakko kaalettees.</p>	<p>Xillo ayaanay nu wozanaa laammanaassinne loyttidi nu Yesuusa malatanaadan nuna laammanawu oottees. Yesuusa nu malatiyoo ogiyaa nuna bessanawu nu wozanan haasayees.</p>
<p><b>6. Meretettaa</b> Shachcha 1, 2, Kessaabaa 20:8-11, Sabancha Dawita 19:1-6, 33:6, 33:9, Sabancha Dawita 104, Ibraawe 11:3</p>	<p>Xoossay ubbabaa medhidaagaa. Hagaa meretaa hanotaa beettaa ayaanaa sheniyaadan yootiyaa Geeshsha maxaafaa gididon qonccissiis. Ussuppun gallassatun Goday “Saluwanne Sa”aa” biittan de”iyaa paxa shemppota ubbaa medhdhidi koyrro saaminttan laappunto gallasan shemppiis. Meretaa oosoy kuuyettidoogaassi hassayisso gidanaadan qassi Sambbataa medhiis. Koyrro merettida attumaynne maccay meretaa oossuwaassi guuto gididi Xoossaa meran merettidosona, alame ubbaa haariyoo maatay etassi imettiis, alamiyoo bonchidi naaganaadan aawatettay etawu imettiis. Alamiyaa merettada kuuyettido wodiyaan “Keehippe lo”o” nne Xoossaa bonchchuwaa awaajjiyaaro.</p>	<p>Xoossay ubbaa medhidaagaa. Ussuppun gallasatun alamiyaa medhdhidi naaganaadan asaa naatussi immiis. Hegaappe simmidi shemppiyoonne a qoppiyoo wodiyaan sambbataa medhiis.</p>
<p><b>7. Asaa Meretaa</b> Shachcha 1:26-28, 2:7, Sabancha 8:4-8, Hawaretu oosuwaa 17:24-28, Shachcha 3, Sabanchaa Dawita 51:5,10 Roome 5:12-17, 2Qoronttoosa 5:19-20,</p>	<p>Attumaynne maccay Xoossaa meran merettidosona, buzo oonatettaara merettidosona, qoppanawu, oottanawunne dooranawu wolqqaynne goqatettay etawu imettiis. Aykeenaa eti goqa gididi mertikokka, shaahettana danddayenna bollaa qottatu, guugiyaanne ayaanaa ayffe eti gidiyooode, de”uwaassi, shemppuwaassinne haraba ubbawu Xoossan zemppidi de”oosona. Koyrro aawati azazzetenan ixixidi makkalido wodiyaan Xoossaa bollan etussi de”iyaa zemppuwaa kaddidi (ekkokko giidi)</p>	<p>Xoossay nuna medhidoy, nu a malatanaadaana. Gidoshin Adaameenne Hewaana nagaraa oottidoogaappe denddidaagan asa ubbay nagaranchcha gidiis, hegaappe guyiyaan sahoynne</p>

<p>1Yohaannisa 4:7-8, 4:11, 4:20, Shachcha 2:15</p>	<p>Xoossaa maataa xaphon de"iyaa xoqqaappe kunddidosona. Hegaappe denddidaagan etu garssan de"iyaa Xoossaa misilee moorettiis, hayquwaassi qashshettidaageeta gididisona. Etu zerettati ha kunddida meretaanne hegaa geeduwaan yiyaabaa koxxiyaageeta gididosona. Daafuraaninne nagaraakko baqqiyaa oonatettaara yelettidosona. Gidikokka Xoossay Yesuusi Kiristoosaani gididi alamiyaa banaara sigettoogaa gidishin Geeshsha ayaanaykka nagaarappe simmidi marotaa geliyaageetu gididon Xoossaaa misiliyaa zaarettidi ooraxxisees. Etikka Xoossaa bonchchuwawu merettidoogaadan A siiqanaadan, issoy issuwaa siiqanaadaaninne bantta heeraa nagana mala xeessettidosona</p>	<p>harggee qassikka hayqqoy ubba asaakko yiis. Gidikokka Yesuusi nagaraappe nuna pattanawunne he barchche ubbaa xayssanawu yiis</p>
<p><b>8. Bayra baaxiya</b> Ajuutaa 12:4-9, Isiyaasa 14:12-14, Izira 28:12-18, Shachcha 3, Roome 1:19-32, 5:12-21, 8:19-22, Shachcha 6 – Shachcha 8, 2Phexiroosa 3:6, 1Qoronttoosa 4:9, Ibraawe 1:14</p>	<p>Asa zeretta ubbay Xoossaa kandduwaa, a wogatanne alame ubban ayiyoo de"iyaa mataa (bollatettaa) xeelliyaaagan Yesuusappenne Xalahiyaappe gididon de"iyaa bayra baaxiyaa gididon de"ees. Hagee baaxee doomettidoy issi dooruwaa goqatettay imettido meretay (Xalahee) otoruwaan Xoossaassi phalqqetta gididonne kiitanchatuppekka amaridaageeta makkalatettawu i kaalettido wodiyaana. Adaamanne Hewaano nagaraakko kaalettido wodiyaan qassi makkalatettaa ayaanaa ha alamiyaan gelissiiis. Hagee asaa naatu nagaray asa zeretta gididon de"iyaa Xoossaa meray moorettanaadaan, merettida alame ubbay shoraa xayanaadaaninne wurssettan qassi alamee muleera bashshaa haattan xayanaadan gaaso gidiiis. Mereta ubbay be"iyoo meran ha biittiyaa alame muliyaa xaaxi waaxida olaa denbba gida uttidaaro gidikkokka wurssettan siiquwaa Godaa Xoossaa xoonuwaan ha olay kuuyettees. Ba deriyaa ha baxiyaa garssan maaddanawu Goday Geeshsha ayanaanne ba ammantiyaa kiiitanchchata ba asaa kaalettanaadan, naaganaadaaninne xoonuwaa ogiyaa bollan etussi miye gidanaadan oottees.</p>	<p>Luusifeeri (Xalahee) zaarettidi Xoossaa kaalennaadan doorido wodiyaan inne a kiitanchchati saluwaappe olettidosona. Xalahee Adaameenne Hewaana Xoossaa siranaadan paacciis, ettikka qassi nagaraa oottidosona. Gidikokka Yesuusi asa kiyidi, polo gidida de"uwaa de"idine nu nagaraa accuwaa qanxxanaassi hayqqiyooogan zaarettidi olettiiis.</p>
<p><b>9. Yesuusa de"waa, Hayquwaanne denduwaa</b> Yohaannisa 3:16, Issiyaasa 53: 1Phexiroosa 2:21,22, 1Qoronttoosa 15:3,4,20-22, 2Qoronttoosa 5:14, 15, 19-21, Roome 1:4, 3:25, 4:25, 8:3,4 1Yohaannisa 2:2, 4:10, Qolasiyaasa 2:15,</p>	<p>Xoossaa sheniyaassi polo azazetida Kirsttoosa de'uwaan, Kirstoosa waayiyaan, hayquwaaninne dendduwaan Xoossay asa naati nagaraappe attiyoo issi atotettaa ogiyaa giigissiiis. Hageekka giigidoy haggaa ammanuwan ekkida ubbaassi merinaa de"oy de"anaadaaninne alame mulee merinawu de"iyaa geeshsha Xoossaa siiquwaa loyttidi akeekanaadaana. Hagee polo gidida atotettaa yarshoy Xoossaa wogaa, a xillotettaanne a kandduwaa kehatettaa awaajjiis. Gaasoykka nu nagaraa borees, qassikka nagaraappe maarees. Kiristoosa hayqqoy nu gishshatawu i hayqqidoogaa gidishin, nagaraa quccanawu, siggettanawunne laammanawu danddayiyaagaa. Kiristoosa denddoy nagaraa wolqqatu bollan Xoossaa xoonuwaa yootiyaagaa, qassikka atotettaa ekkiyaa ubbaassi eti nagaraanne hayquwaa bollan xoonuwaa</p>	<p>Aawaynne na"ay ha alamiyoo nne asaa medhdhanaappe kassiyaa "geelonaadan harabay qassi...hanikko" giyyaagaa mala halchchuwaa kessidosona. Asa naati Xalahiyaa kaallanawu doorikkonne nagaranchcha (Xoossaa morkketa) gidikko waatidi eta ashshanaakkonne halchchuwaa kessidosona.</p>

Filiphisiyuusa 2:6-11	demidoogaa awaajjees. A sinttan saloyne sa"ay, gulbata ubbay assi gulbatiyoo kirstoosa godatettaa awaajjees.	
<p><b>10. Atotettaa meezetiyoogaa</b>  2Qorontoosa 5:17-21, Yohaannisa 3:16, Galaatiyaa 1:4, 4:4-7, Tiitu 3:3-7, Yohaannisa 16:8, Galaatiyaa 3:13-14, 1Phexiroosa 2:21-22, Roome 10:17, Luqaasa 17:5, Marqqoosa 9:23,24, Efisoona 2:5-10, Roome 3:21-26, Qolasiyaasa 1:13,14, Roome 8:14-17, Galaatiyaa 3:26, Yohaannisa 3:3-8, 1Phexiroosa 1:23, Roome 12:2, Ibraawe 8:7-12, Izira 36:25-27, 2Phexiroosa 1:3-4, Roome 8:1-4, 5:6-10</p>	<p>Xoossay ba merinaa siiquwaaninne ba maarotaan nuuni geeyana mala nagari baynna Yesuusa nu nagaraa gishatawu kiittiis. Geeshsha ayaanan kaalettidi nuussi paccidabaa akeekoos, nagaranchchatettaa nuugaa hassayoos, a wogaa kanttido gishshawu maarotaa geloos, Yesuusa goda oottidi ammaniyoogaa meezetoos. Qassikka nu gishshatawu i yiidoogaanne a leemiso oottidi ekkoos. Hagee pattiyaa ammanoy Xoossaa ayaanaa qaalaa baggaara yiyaa Xoossaa aaro kehatettaa gidees. Kiristoosan geeyida, Xoossay ba attumanne macca naata kessidi nuna ekkiis, nagaraa ayllettaappekka la"atettaawu kiyida. Geeshsha ayaanaa baggaara zaarettidi yelettida, geeyida, Geeshsha ayaanay nu guuggiyaa ooraxissees, Xoossaa siiqo azazota nu wozanaan xaafees qassikka geeshsha de"uwaa nu de"anaadan wolqqaa immees. Aani de"iyoogan a ayaanaa oonatettaa shaakkiyaageeta gidoos, hachchikka gidin a pirddaa gallassan nuussi waasee de"ees.</p>	<p>Biron nu assi morketa gidi uttidaashin Xoossay nuna siiqidi nuna ashshanawu Yesuusa kiittiis. Yesuusa nu ekkiyoo wode nunakka ba naata oottidi ba keettaa asaakko ekkees.</p>
<p><b>11. Yesuusan dicciyoogaa</b>  Sabancha Dawita 1:1-2, 23:4, 77:11-12, Qolasiyaasa 1:13-14, 2:6, 2:14-15, Luqaasa 10:17-20, Efisoona 5:19-20, 6:12-18, 1Tasalonqqe 5:23, 2Pexi 2:9, 3:18, 2Qorontoosa 3:17, 18, Filliphisiyuusa 3:7-14, 1Tasalonqqe 5:16-18, Maatiyoosa 20:25-28, Yohaannisa 20:21, Galaatiyaa 5:22-25, Roome 8:38, 39, 1Yohaannisa 4:4,</p>	<p>Kaqqetti hayqqidi Goday iitaa bollan xoonuwaa awaajjiis. Ha biittaa bollan hagaaziyoo wodiyaan tuna daydanttaa ayaanata xoonida Yesuusi tunatu wolqqaa mentterettiis, wursettanka eti Xayanawu de"iyoogaa tumayyiis. Yesuusaara issippe saruwan, uffayssaaninne a siiquwaa akeekiiddi nu hemettido qoodan Yesuusa xoonoy nuna haaranaassi koyiyaa tuna wolqqatubollan nuussi Xoonuwaa immees. Qanxxenan ubbatoo Yesuusa nuna ashshiyagaanne nu xale kessidi nunatettaa assi aattidi immido keenan nuussi de"iyaa kase kandduwaa tohuwaappe goqatoos. Polo hagaappe guyiyaan xuman, iita wolqqatun, eri baynaaninne kase ogiyaan hadan de"okko. Yesuusan nu demmido ha ooratta goqatettan a kandduwaa malatiyoogan diccanawu, ubba gallassi aara woosan gayttanawu, a qaalaa maanawu, a qaalaanne a kehatettaa (I nuussi oottidobaa) qoppanawu, galataa sabbanawu, goynnuwaassi issippe shiiqanawu, qassikka woosiyoo keettee kiitaa oosuwaan walahettanawunne ha ubban diccanawu xeessettida. Nu yuushuwaan de"iyaageetussi siiquwaan</p>	<p>Yesuusi Xalahiyaa masqalliyaa bollan xoonido gishshawu nunukka xoonana danddayeettee, geeshsha ayaanan zempidi galla galla aaruwaa Yesuusa malatanawu diccana danddayoos.</p>

Ibraawe 10:25	hagaazanaassinne nu Goday ashshiyoo gaadan markkatanaassi nunatettaa nu aatti immido keenaa a ayaanaa baggaara nu kanddo ubbay ayaanaa meezziyaakko laamettees.	
<b>12. Woosa keettiyoo</b> Shachcha 12:3, Hawaaretu oosuwa 7:38, Efiisoon 4:11-15, 3:8-11, Maatiyoosa 28:19-20, 16:13-20, 18:18, Efiisoon 2:19-22, 1:22-23, 5:23-27, Qolasiyaasa 1:17-18	Woosa keettiyaa Yesuusi Godanne xale giddiyoo gaadan awaajjiyaa ammaniyaageetu issipetetta. Gal'aa maachchaa wode de'ida xoossaa deretu tohuwaa kaallidi goynuwaassi shiiqanawu. Issippetettaassi, a qaallan minnanawu, Godaa kahuwaa baalaa oottanawu, asa zeretta ubbaa hagaazanawu qassikka alame yuushuwaan wogelaa awaajanawu alamiyaappe dummatidi kiyida. Woossiyoo keettee maataay pulattiyooy asho kiyida qaala Yesuusappenne Xaafettida qaala Geeshsha maxaafaappe. Woosa keettiyaa Xoossay banaata oottidi ekkidoogeeti haphettiyooy Xoossaa keetta gidyoode Xoossaa naati ooratta maachchaa maaraadan de'oosona. Woossiyoo keettiyaa Yeesuussa yaranne Yeesuusi issi huuphe gidido derettetta. Woossiyoo keettiyaa geeshshanaassinne xillisanaassi giidi Goday hayqqido mushurriyooy. I bonchchuwaan qoncciyoo wodiyaan wodetu ubban ammanidaaro, a suutta waaga, qitti baynna woykko sinttay xumenna geeshshanne boree baynna xoqqa woosa keetta oottidi baasi shiishees	Yesuusa siiqiyaanne a kaaliyoogaa tamaridi biittan de'iyaa ubbay Xoossaa kettaa asa. Ha keetta asay dumma dumma asa qottatuppe oosettidaagaa gidishin Yesuusi qassi kaalettiyaagaa.
<b>13. Attidaaronne i kiitaa</b> Ajjootaa 12:17, 14:6-12, 18:1-4, 2Qorontoosa 5:10, Yihudaa 1:3, 1:14, 1Phexiroosa 1:16-19, 2Phexiroosa 1:16-19, 2Phexiroosa 3:10-14, Ajjoota 21:1-14	Alame yuushuwaan de'iyaa woosa keettiyaa bantta wozanaappe amanida ubbaa ba giddon oykkawusu. Gidoshin wursettaa galassatun aahuwaan daayida kadettaa giddon attidaageeti Xoossaa azazota naaganawunne Yesuusa ammaniyoogan minni eqqanaassi xeesettidi kiyidosona. Ha attidaageeti pirddaa wodee gakkidoogaadan awaajjoosona. Ha awaajjoy Ajjootan 14 bollan de'iyaa heezzu kiitanchchatu leemissuwaan shiiqqiis, hageekka saluwaan de'iyaa pirddaa oosuwaara gaytidaagaa gidishin sa'aa bollan qassi atottettaanne ooratatettaa ayfiyaa ayfees. Ammaniyaasa ubbay issoynne attenaa ha alame yuusho markatettaan yarattana mala xeesettiis.	Attidaageeti biittaa bollan wursettan attida Yesuusa siiqqiyaanne kaalliyaageta gidishin ha wursettaa gallassatun eti oottiyoo dummatida oosoy de'ees.
<b>14. Yesuusa bollaa giddon de'iyaa issippetettaa</b> Roome 12:4-5, 1Qorontoosa 12:12-14, Maatiyoosa 28:19-20. Sabancha Dawita 133:12Qoro 5:16-17,	Woosa keettiyaa dumma dumma biittaappe, kochchaappe, doonaappenne deretuppe xeesettida daro ammaniyaasa atuppe oosettida issi bolla. Yesuusaa nuuni ubbaykka ooratta mereta. Zariyaa dummatettay, wogay, tamarido darajay, biittaawatettay, gitaanne guutta attumaanne maccaa giddon de'iyaa dummatettay nu giddon shaahetuwa ehaanawu poloppe koshshenna. Issi ayaanan aaranne nugiddon issuwaa gidanaadan qachchida Yeesuusaa nu ubbaykka lage, dummayi xeellenaaninne	Woosa keettiyaa dumma gidida cora asaappe meretaasu. Gido shin ubbaykka issippetettan alamiyaassi Yesuusabaa odanawu oottoosona

<p>Hawaaretu oosuwaa 17;26-27, Galaatiyaa 3:27, 3:29, Qolasiyaasa 3:10-15, Efisoona 4:14-16, 4:1-6, Yohaannisa 17:20-23</p>	<p>yeelatenaan hagaazanawunne hagaazettanawu koshshees. Geeshsha maxaafaa gidдон Yesuusan imettida qonccettaa maaraadan nu ubbaykka issi ammanuwaanne issi hidootaa koxxiyaageeta gidishin alame ubbaa nu gakkiiyaa markkatettaykka issuwaa. Ha issippetettay pulitiiyoy nuna ba naata oottidi ekkida heezetettaa gidдон issuwaa gidida Godaa Xoossaappe.</p>	
<p><b>15. Meechchaa</b> Roome 6:1-6, Qolasiyaasa2:12,13 Hawaretu oosuwaa 16:30-33, 22:16, 2:38, Matiyoosa 28:19,20</p>	<p>Meechchan Yesuus Kiristoosa hayquuwaaninnen dennduwaa bollan nuusi de"iyaa ammanuwaa awaajjooos, qassikka nagaraassi nu hayqqidoogaanne ooratta de"uwaan simerettanaassi qachchidoogaadan markkateettes. Hegaa gishshawu Kiristoosa godadaaninne nuna ashshiyaagaadan oottidi ekkooos, a dereta gidoos, qassikka a woossa keettiyaa nun aba yara oottada ekkawusu. Meechchay Kiristoosaara nuussi de"iyaa issippetettaa, Nagaraa atatettaa, qassikka nu Geeshsha ayaanaa ekkiiyoogaassi leemiso gidees. Meechchay haatta garssi loyttidi muukettiiyoogan polettayaagaa gidishin Yesuusa bollan nuussi de"iyaa ammanuwaan zempidaagaa qassikka nagaraappe nu atatettaa ekkiiyoogaa malaata. Meechchay Geeshsha maxaafaa tamaariyoogaanne timirtiiyaa (tamaariissuwaa) ekkiiyoogaappe guyiyaan kuuyettes.</p>	<p>Geeshsha maxaafay Yesuusa nuna ashshiyaagaadan oottidi nu dooridoogaanne aaruwaan qassi nu a malattiidi diccanaadana nu koyiiyoogaadan bessanawu nuuni meecettanaadan tamarisseees.</p>
<p><b>16. Godaa kahuwaa</b> 1Qoronttoosa 10:16-17, 11:23-30, Matiyoosa 26:17-30, Ajjuuataa 3:20, Yohaannisa 6:48-63, 13:1-17</p>	<p>Godaa kahoy Yesuusa ashuwaanne suuttaa leemiso gididaageeta shaakkiyoogan a Godanne ashiaagaa oottidi ekkidoogaa besseees. Ha issippetettaa haggaazuwaan Kiristoosi ba deriyaara gayttanawunne mintettanawu beettees. Ha hagaazuwaan nu walahettiiyoode I naa"antto yaana gakkanaashin uffayssan a hayquuwaa awaajjeettes. Godaa kahuwaassi giigetiiyoogee banatettaa pilggiyoogaa, maarotaa geliyoogaanne nagaraa paaxiiyoogaa xaaxi waaxees. Goday Yesuusi tohuwaa meechchaa hagaazuwaa geeshidoogaa gidishin hageekka bessiiyoy oorattida geeshatettaa, issoy haraa Yesuugaa malatiyaa kehatettan hagaazanaassi de"iyaa sheniyaanne siiquwaan nu wozanaa issuwaa nu oottidoogaa. Godaa kahuwaa haggazoy ubba ammaniyaa asaassi dooya de"ees.</p>	<p>Yesuusi masqaliyaa bollan haasayidoogaanne I nuussi oottidobaa hassayanaassi Godaa kahuwaa shaakkoos. Tohuwaa meechchay Yesuusi oottidoogaadan issoy haraassi naagettanaadan qofisseees.</p>
<p><b>17. Ayaanaa imotatanne hagaazota</b> Roome 12:4-8, 1Qoronttoosa 12:9-11, 12:27-28, Efisoona 4:8, 4:11-16, Hawaaretu oosuwaa 6:1-7,</p>	<p>Xoossay woosa keettaa garssan de"iyaa asaassi ubbawu ubba laytattunkka ayaanaa imotata immidaba gidishin imotatakka ubba ammaniyaa asay woossiiyoo keetteessi de"iyaa go"aaassinne asa zeretta ubbaa go"aaassi siiquwaan go"ettana mala Xoossaassi halchchoy de"ees. Ubbassikka ba sheniyaadan shaakkidi immiyaa Geeshsha ayaanaa oosuwaan imettiyaa ha imotati woossiiyoo keettiyaa baassi imettida kiitaa polana mala iyyiyoos koshsiiyaa hiillatanne hagaazota o mayzsoosona. Geeshsha maxaafay yootiiyoogaadan ha imotatu gidдон ammannoy, pattiyoogee, hiraagay,</p>	<p>Xoossay nu assi oottanaadan nuussi ubbaassi dumma gidida imotata immees.</p>

<p>1Ximootiyoosa 3:1-13, 1Phexiroosa 4:10,11</p>	<p>hawaaretettay, tamarissiyoogee, ayssiyoogee, sigettiyoogee, kehatettayne hara asaa maaddanawunne mintettanawu banatettaa aattidi immiyoo hagaazoti beettoosona. Guutta asati Xoossaappe xeessaa ekkidinne Geeshsha ayaanan kumidi woossiyoo keettiyaa etussi maataa immin etussi imettida hagaazotun; Pasterettan, Wongelaawetettan, Hawaaretettaninne Astamaaretettaa hagaazotun erettoosona, hageeti dummatida meran ammaniyaa asaa hagaazuwaassi gixxissidi denttanaassi, wossiyoo keettiyaa ayaanan ka'ana malanne ammanuwaa issippetettaanne Xoossaa eriyogaa aassannaassi hagaazoosona. Ammaniyaa asayne Xoossaa aaro kehatettaadan ammanttiyaa woossa keettiyoo kaalettiyaageeti ha ayaanaa imotata suure go'ettiyoode woosa keettiyaa worddo (bala) tamarissotuppenne bashshaappe naagettawusu, Xoossappe gidida dichchaa diccawusu, qassikka ammanuwaaninne siiquwaan minnawusu.</p>	
<p><b>18. Hiraagaa imotaa</b> Yuu'eela 2:28-29, Hawaretu oosuwa 2'14-21, Ibraawe 1:1-3, Ajuutaa 12:17, 19:10</p>	<p>Geeshsha ayaanaa imotatuppe issoy hiraagaa. Ha imotay attida woosa keetteessi qonccetta gidida imota gidishin Elen Ji huwayti hagaazuwaan qoncciiis. Xoosaa kiitaa gattiyooagaan i maxaafati eqqenne ayaanaa maataa maayida tumatu pulito gidishin ha maxaafati woossiyoo keetteessi minttettuwa, kaaletuwa, ayssuwaanne giigisuwa immiyaageeta. Ha maxaafati Geeshsha maxaafay ubba tamarissotinnee meezeti paaccettiyooyigetta gidiyooagaan qoncce oottidi wottoosona.</p>	<p>Xoossay Ellen Jii Huwaytissi hiraagaa imotaa immiis. Xoossay issi immido kiitati nu woosa keettiyaa alame ubban diccanaadan maaddiis.</p>
<p><b>19. Xoossaa wogaa</b> Shachchaa 20:1-17, Sabancha Dawita 40:7,8, Matiyooosa 22:36-40, Zedaagime 28:1-14, Matiyooosa 5:17-20, Ibraawe 8:8-10, Yohaannisa 15:7-10, Efisoona 2:8-10, 1Yohaannisa 5:3, Roome 8:3,4, Sabancha Dawita 19:7-14</p>	<p>Xoossaa wogaassi bayra gidida huuphe yohoti tammu azazotu gididoninne Yesuusa de'uwaan qonccidaageeta. Asaa kandduwaanne gaytotettata xeelliyaganika ha wogati Xoossaa siiquwaa, a sheniyaanne a halchuwaa qonccissiyaageeta gidishin ubba deretettatuuninne ubba layttatu bollan oottiyaageeta. Hageeti Xoossay ba deriyaara gelido maachchaassi baasonne Xoossaa pirdday yigettiyooogeeta. Geeshsha ayaanaa oosuwa baggaara nagaraa malaatoosona ashshiyaagee nuussi koshshiyoogee siyettanaadan nuna beegoyoosona. Atotettay mulleera a aaro kehatettaanappe attin oosuwaana gidenna. Atotettaassi ayfee qassi a wogatussi azazettiyoogaa. Ha azazettiyoogee qassi issi ammaniyaa asassi de'iya kandduwaa puulayiyaagaa gidishin sarotettay he izaawussi siyettanaadan oottees. Nu Goodaa nu siiqqiyoogee nu laggiyaa (Shooruwa) nu qoppiyoogaassi qonccetta. Ammanuwaappe pulitida azazettiyoogee Yesuusa wolqqay de'uwa laammanaassi de'iya abbiyaa bessiyaagaanne ammanuwaa markkattiyooagaakka mintettiyaagaa.</p>	<p>Xoossaa wogay nu payatettaanne ufayssaa naagees. Yesuusa nu kaalliyooode Xoossaa wogaassi azazettoos.</p>

<p><b>20. Sanbbataa</b> Shachcha 2:1-3, Kessaabaa 20:8-11, Luqaasa 4:16, Isiyaasa 56:5-6, 58:13-14, Matiyoosa 12:1-12, Kessaabaa 31:13-17, Izira 20:12, 20:20, Zedaagime 5:12-15, Ibraawe 4:1-11, Leewetu 23;32, Marqqoosa 1:32</p>	<p>Meretettaa keha Goday ussuppun meretaa gallassatuppe guyyiyaan laappuntta gallassan shemppiis. Qassikka ubba asaassikka meretaabaa hassayiyoo gallassa gidanaadan sambbataa medhiis. Xoossaa Laamettena wogatu gidдон oyddantto azazoy laappuntto gallassay (Sambbatay) Sambbataa Goda gidida nu Godaa Yesuus Kiristoosa timirtiyaaranne meeziyaara issi mala meran shemppiyoo, goynniyoonne hagaaziyoogaa gallassa gididi bonchchettanaadan azazees. Sambbatay Xoossaanne nu gidдон issoy issuwaara uffayssan kumida issippetettay oossettiyoogaa gallassa. Yesuusannu nu paxidoogaassi malaata, nu geeyidooggaa bessiyoo, a Godatettaa nu ammaniyoogaadan qonccissiyoo gaanne sinttanawu Xoossaa kawotettaan nuussi de"iyaa merinaa de"uwaa leemisuwaa. Sambbatay Godaappenne a deriyaa gidдон de"iyaa Xoossaa merinaa maachchaa malaata. Haggaa Geeshsha wodiya qammaappe qammawu, awa ayfee wollo saattiyaa awa ayfee wullana gakkanaashin uffayssan bonchchiyoogee Xossay medhidoogaaninne ashshidoogaan uffayttiyoogaa bessees.</p>	<p>Laappuntto gallassay merettaassi baala gallassa. Ubbatoo nu polliyoogaa kanddota issi baggi zaaridi Xoossaa issippe gidanawu woddiya ekkiiyoogee geeyida gallassa.</p>
<p><b>21. Godaa Hadaraa Tookkiyooga</b> Shachcha 1:26-28, 2:15, 1Zeena 29:14, Hagee 1:3-11, Mikkiyaasa 3:8-12, 1Qoronttoosa 9:9-14, Matiyoosa 23:23, 2Qoronttoosa 8:1-15, Roome 15:26-27</p>	<p>Nuuni Xoossaa hadaraara de"iyageeta (Xoossaa deriyaa tamarissanawu doorettidaageeta) gidishin wodetanne qaadata, nu wolqaanne dorettaa, qassikka ha biittaa anjjotanne murutata hadaran a kushshiyaa ekkida. Nu hageeta bessiyaa oggiyaadan go"ettiyogaa xeelliyaa aani nu oyshshettiyageeta gideettees. Xoossaanne qassi nu laggiyaa (Shooruwaa) ammantiyaa hanotan hagaaziyoogan qassikka wongelay aahuwaan awaajjettana mala woossiyoo keettee dichchaa zempissanawu asirataa zaariyooganinne mutsuwaataa (sixootaa) immiyoogan Xoossaa aawatettay (azinatettay) erettanaadan oottoos. Xoossaa hadaray siiqquwaappe pultida bonchchuwaa ootanaassinne bana siiqqiyogaanne ta xallawu giyoogaa xoonanaadan Xoossaa imettida qaada. Ha hadaraara de"iyaa asi ba hagaazuwaa bargaara haraati demmiyoogaa anjjuuwaan uffaytees.</p>	<p>Xoossay ha biittiyoo, nu asatettaanne wolqqaa nuussi immiis. Nu eta naaganaadaaninne a oosuwaa ootanaadan nuuppe koyees. Asirataa zaariyooganne sixootaa immiyoode Xoossay nuna anjjees.</p>
<p><b>22. Ammaniyaa asaa kandduwa</b> Roome 12:1-2, 1Yohaannisa 2:6, Efisoona 5:1-21, Filiphisiyuusa 4:8, 2Qoronttoosa 10:5, 6:14-7:1, 1Phexiroosa 3:1-4, 1Qoronttoosa 6:19, 20, 10:31, Leewetu 11:1-47, 3Yohaannisa 2</p>	<p>Nuuni xeesettidoy saluwaa meezetuura malattiyaa meran qoppiyaageeta, siyettiyooganne polliya Xoossaa dere gidanaadaana. Ayaanay nu gidдон Godaa kandduwaa zaarettidi medhdhanaadan nunikka Kiristoosaagaa malattiyaa geeshshatettaa, payatettaanne uffayssaa nu de"uwaan medhdhiyaabatun walahettidi nu oosuwaa pollana koshsheettees. Haggaa giyoogee nuuni nu huuphiyaa shempissanawunne uffayttanaassi biyoo ogeti nu ammanuwaa yigetatu mal"uwaassinne puulaasii xoxxa soho de"iyoo geeta gidana koshshees. Wogatu (baahiletu) dummatettaa akeekiidi nu maayuwaa maayettaa maaray nu ammanuwaa bulqqoyenna, geeshsha gididaagaa qassikka nu maayiyoo maayuwaa puulatettay bolla mera kanchee keehiln lo"o cilicilliyaa gidanan de"iidi xayenna puullaa lo"onne woppu giida Geeshsha ayaanaara de"iyaa asaa bessiyaa gidana koshshees. Haggaa giyoogee qassi gujuwaan nu asatetta qottati Geeshsha ayaanay aqqiyoo soho giddiyoo keesaa akeekiyoogan nu etussi naagettana koshshees. Giddiyaa bollaa qaattan (Sporttiyaa) shempuwaara issippe danddayettaagaa</p>	<p>Asaa kandduwaa xeelliyoo ooni Yesuusa kaalliiddi de"iyaakonne eranaassi danddayeeta. Haggaa gishshawu Yesuusaagaadankka nuunikka Keha, Lo"o laggenne asaa siyidi akeekiyaageeta gidana koshshees. Nu asatettati Xoossay nuussi immidobata giddiyoo gishshawu eta naaganawu koshshees.</p>



	<p>keena payya qummaa meettaa kaalliyooogan Geeshsha maxaaffan xaafettida geeshsha giddenna qumattuppe nunatettaa naaganawu (haassanawu) koshshees. Alkooliyaara de"iyaa ushshata, Tambbuwaanne maatay immettibeenna xaletanne beegoyiyaabata go"ettiyoogaappe nu asatettaassi hageetti iitta giddiyoo gishshaassi hageettuppe qassi haakkanawu koshshees. Hagaa gidenan de"ishin nu kumettatettaa, uffayssaanne lo"otettaa koyiyaa Kiristoosa maaraakko nu qofaanne asatettaa qottata kaalettiyaa ubbabatu gidдонkka walahettana koshshees.</p>	
<p><b>23. Gelettiyoogaanne keetta asaa</b>  Shachcha 2:18-25,  Matiyoosa 19:3-9,  Yohaannisa 2:1-11,  2Qoronttoosa 6:14, Efisoona 5:21-11, 2Qoronttoosa 6:14,  Efisoona 5:21-33, Matiyoosa 5:31-32, Marqqoosa 10:11-12, Luqaasa 16:18,  1Qoronttoosa 7:10,11,  Kessaabaa 20:12, Efisoona 6:1-4, Zedaagime 6:5-9,  Leemiso 22:6, Milkkiyaasa 4:5,6</p>	<p>Gelettiyoogee ayaanaa oosuwaan Eedeeni ganattiyaan doomettidabanne Yesuusikka issi attumappenne issi maccappe gidduwan siiquwaa issippetetan baasettida eti hayqqana gakkanaashin de"iyaa issippetetta giddiyooagaan qonccissidoogaa. Ammaniyaa asaassi gelettiyoo qaala maachchaa giyoogee eti Xoossaassinne gelettiyoo laggiyaassi geliyoogaa gidishin hageekka hanana koshiyoy ammanuwaan issuwaa gidida waatattu giddo xalaalaana. Gelettiyaageetu gidдон de"iyaa siiqoy, bonchchettiyooeenne aawatettay ha gaytotettay qashettido wodorota gidishin hageekka Kiristoosappenee a woosa keetteppe gidduwaan de"iyaa siiquwaa, geeshshatettaa, matatettaanne eqqenna gaytotettaa qonccissana koshshees. Shaahettiyooгаа xeelliyaaagan Yesuussi haraara tunniyoogaa gaaso gidenan hara gaasuwaan machcheeppe shaahettiyaageenne hara machchiyoo ekkiyaagee laamiyaa oottiyooagaan tamarissiiis. Aykeena gidikkokka issi issi keetta asay worqqaa gidida issippettaa gidдон de"ennaba gidikkokka issoy haraassi banatettaa aattidi immiyooogan, Geeshsha ayaanaa kaaletuwaaninne etu woossiyoo keettee naaguwaa baggaara siiquwaan kumida issipettaakko gakkanawu danddayoosona. Xoossay keetta asaa anjjees, kettaa asaa yara gidida asi kummetta wozanaamanaadan issoy hara maadanaadan koyees. Yelidaageeti bantta naati Godaa siiqanaadaaninne azazettanaadan tamarissidi dichhana koshshees. Yelidaageeti leemisotettaaninne qaalan bantta naatussi Kiristoosi siiqiyaanne suuretettaa tamarissiyaagaa, ubbatoo kehanne nu gishshawu naagettiya ubba qassi ba yara (Xoossaa soo asa) eti gidana mala koyiyaagaa i giddiyooagaan bantta naatussi qonccissana koshshees. Keetta asaa gidдон de"iyaa diccidi biyaa matatettay wursetta wongeliyaa kiitaassi issi qonccetta.</p>	<p>Xoossay keetta asaa dosees. Addameppenne Heewaanippe wottidi hachi gakkanaashin yelidaageetti issippe de"anaadaaninne bantta de"o wode ubban issoy hara siiqanaadan koyees. Uba asaassikka payatettayne siiqoy de"iyoo keettay de"anaadan Xoossay koyees.</p>
<p><b>24. Saluwaa Meqidessiyaan Kiristiyoosa hagaazuwaa</b>  Ibraawe 8:1-5, 4:14-16,  9:11-28, 10:19-22, 1:3, 2:16,</p>	<p>Saluwaan Geeshsha keettay de"ees, Godaanappe attin asan tokettibeenna dinkkuwaanee de"ees. He sohuwaan Yesuusi nu gishshawu haggaaziidi de"iyooгаа gidishin hagaani i masqqaliyaa bollan issitonne merinawu shiishido atotettaa yarshuwaa go"ati ammaniyaa asa ubbaassi gakkanaadan oottees. Saluwaa I biido wodiyaan nuussi kaahine halaqa gididi nu gishshawu gaanatiyoo oosuwaa doommiis. Hiraagaa maaraadan 2300 gallassatu wodetu kuushshan 1844dan naa"anttonne</p>	<p>Saluwaan Xalahee nuna "nagaranchchata" giidi moottiyooде Yesuusi nu miyyiyaan eqqees. "He asassi ta hayqqaas" yaagees Yesuusi. Nuuni a kaaliyoogaan biigikko</p>

<p>17, Daaneela 7:9-27, 8:13, 14, 9:24-27, Zehulqu (Qoodaabaa) 14:34, Izira 4:6, 7, 20:12, 14:12, 22:12</p>	<p>wurssetta maarotettaa oosuwaa oottiyoo kifile giddo geliis. A hagaazoykka pilgettaa baaso oottida pirddaa gidishin hageekka beni ayhuudatu meqidesiyaan maarotettaa gallasan pollettiyaa geeshshatettaa leemisuwaadan qonccida nagara ubbay yedetettiyoos wurssetta oosuwaa qottaa. He leemiso oosuwaan meqidesees medoosatu yarshshuwaa suuttan geeyees, yohuwan qassi saluwaan de"iyaabati Yesuusa polo suuttaa yarshshuwaan geeyeesona. Pilgettaa baaso ootti eqqida pirdday saluwaan de"iyaa de"iyaa guuggee de"iyoo meretatussi Kiristoossan gididi xiskkidaageeti de"iyooogaadaaninne hageetikka aani koyrro dendummaa qaadaa demmana mala koshshiyooogaadan qoodettidoogaadan bessees. Gujuuwaan qassi de"uwaan de"iyaageetu giddoppe Kiristoossan gididaageeti, Xoossaa azazota naagiyaageetinne Kiristoossan ammanoy de"iyooageeti (aani ammaniyaageeti) saluwaa kawotettaa gelanaassi giigidaageeti de"iyooogaadan bessees. Xoossaassi ammantiyaageeta gididiyoogan gididiyoogan minni eqqidaageeti a kawotettaa laattiyooogaadan awaajjees. Ha Kiristoosa hagaazuwaa kuushshay a naa"antto yuussaappe kasetidi asaa naatuzzi attiyoo qaaday kuuyettiyoogaa qonccissees.</p>	<p>ikka nu miyyiyaan eqqiyooqaa aggenna. Yesuusi zaarettidi yaanaappe kasiyaan ha biittaaan de"ida asa ubbaa pirddaakko shiishshiyooqan merinawu aara de"anawu danddayiyaay oonakko kuuyees.</p>
<p><b>25. Kiristiyoosa Naa"antto yuussaa</b> Tiitu 2:13, Ibraawe 9:28, Yohaannisa 14:1-3, Hawaareu oosuwaa 1:9-11, Matiyooosa 24:14, Ajjuutaa 1:7, Matiyooosa 24:43-44, 1Tasalonqqe 4:13-18, 1Qoronttoosa 15:51-54, 2Tasalonqqe 1:7-10, 2:8, Ajjuutaa 14:14-20, 19:11:21, Matiyooosa 24, Marqqoosa 13, Luqaasa 21:2, 2Ximootiyooosa 3:1-5, 1Tasalonqqe 5:1-6</p>	<p>Yesuusa naa"antto yuussay woosa keetteessi de"iyaa anjjettida hidoottanne wogelaassikka xeera. Xaliyaa yeettay leemiso gidennan de"iidi salo sa"a guffanto ubban qoncciyaan beettiyaagaa gidees. I simmiyoo saatiyaan hayqqida geeshsha asati de"uwaa demmidi paxa de"iyaa geeshshatuura bonchchuwaa maayidi pude saluwaaw ekettoosona, shin nagaranchchati hayqqoosona. Ubba hiraagattikka polettidosona giisiyaa meran daro hiraagati polettiyoogee, ha"i ha alamiyaa hanotaara gatti xeelliyoode Yesuusa yuussay keehippe matattidoogaa yootees. He gallassay qoncciihibeenna, gidikokka ubba wode nu giigettidaageeta gididi naaganaan mino zoriyaa ekkiida</p>	<p>Malaatati ubbay yootiyooogaadan Yesuusi mata wodiyaan yaanawu de"ees. I yiyoodekka biittaa de"iyaa ubbay be"anawu de"ees.</p>
<p><b>26. Hayquuwanne dendummaa</b> Roome 6:23, 1Ximootiyooosa 6:15-16, Mekibibe (Eranchchaa) 9:5, 6, Sabancha Dawita 146:3-4, Yohaannisa 11:11-14, Qolaasiyaasa 3:4, 1Qoronttoosa 15:51-54, 1Tasalonqqe 4:13-17,</p>	<p>Nagaraassi qanxxoy hayquuwaa. Yohuwan qassi I barkka hayqqenaagaa gidida Xoossay wozettidaageetuzzi merinaa de"uwaa immees. He gallassay gakanashin hayquuwaa giyogee ubba assikka eti aybbanne erana dandayenna hanotaa gidees. Nuussi de"o gidida Kiristoosi qoncciyooode hayquuwaappe dendummaa geeshshatinne de"uwaan de"iyaa geeshshati bonchchuwaa maayidi bantta Godaara gayttanawu saluwaa pude paalloosona. Naa"antto dendummaa nagaranchchatu dendummaa geetettees sha"u layttatuppe guyiyaan polettees.</p>	<p>Nagaray nu alamiyaa gelidoogaappe dendummaan asay hayqqees. Issi asi hayqqiyooode xiskkida asadan hannees Yesuusi naa"antto yiidi xeessana gakkanaashin dendummaa.</p>

Yohaannisa 5:28-29, Ajjuuataa 20:1-10		
<p><b>27. Sa”u layttaanne</b>  <b>Nagaraa kuushshaa</b>  Ajjuuataa 20, 1Qoronttoosa 6:2-3 Erimaasa 4:23-26, Ajjuuataa 21:1-5, Milkkiyaasa 4:1, Izira 28:18-19</p>	<p>Sha”u layttay koyirro dennduwaappenne naa”antto dennduwaappe gidduwan Yesuusinne Geeshshati saluwan kawotiyooqaa. He wodiyaan nagaranchatu bollan pirdettees. Biittiyaa issi asinne bayna sohonne Xalaheenne a kiitanchatu xalay de”iyoo mela soho gidawusu. Ha wodee kuuyettiyoode Kiristoosinne Geeshshati Geeshsha katameera issippe saluwaappe sa”awu wodhoosona. Hegaappekka guyiyaan hayqqida nagaranchati dendidi Xalahiyaaranne a kiitanchatuura issippe gididi katamiyoo doodoosona shin gidikokka tamay Xoossaa matappe wodhidi eta mees biittiyookka geeshshees. Hegaappe guyiyaan alame ubbay nagaranchatuppe geeyees.</p>	<p>Yesuusi simmidi yiyoode an ammananawu doorida ubbaa issi sha”u layttatussi saluwaa ekidi efaanawu de”ees. Ha sa”an attida ubbati hayqqoosona. Sha”u laytatuppe guyiyaan Yesuusinne a deree Geeshsha katamee ooratta yerusalameera issippe guyye sa”aa yoosona. Hegaappe guyiyaan Xoossaa ixida ubbay zaarettidi dendidi Xalahiyaa kaalloosona katamiyookka bogganawu maloosona. Gidikokka Xoossay nagaraanne nagaranchchata merippe merinawu xaysees.</p>
<p><b>28. Ooratta biittiyoo</b>  2Phexiroosa 3:13, Isiyaasa 35: 65: 17-25, Matiyoosa 5:5, Ajjuuataa 21:1-7, 22:1-5, 11:15</p>	<p>Geeshshatettay de”iyoo ooratta biitteeni attidaageetussi merinawu de”iyoo keettayenne a qonccettaa giddon merinaa de”oy, siiqoy, uffayssayenne timirttee de”iyoo polo gidida heeraa (environment) Xoossay etussi immees. Hegan Xoossay i ba deretuura de”eessinne tuggayenne hayqqoy merinawu attoosona. Bayrra baaxee kuuyettees nagaraykka hegaappe guyiyaan de”enna. Ubbabatikka ayfiyaan beettiyaanne beettenabati ubbay Xoossay siiqo giidi awaajjoosona ikka merinawu kawotees. Amin”i.</p>	<p>Nagaray merinawu xayidoogaappe guyyiyan koyirro Edeni Ganattiyaadan gidida polonne ooratta biittay merettees. Hegaappe guyyiyan Goday nunaara issippe merinawu de”ees.</p>
<p><b>Pulttuwaa</b></p>	<p><a href="http://www.adventist.org/beliefs/fundamental/index.html">http://www.adventist.org/beliefs/fundamental/index.html</a>  Seventh-day Adventist Believe: A Biblical Exposition of Fundamental Doctrines, PPA 2005</p>	<p>What We Believe for Kids  J D Thomas, PPPA 2006</p>

*Hagee Wolaitatuwaan birshettidi Xaafettidoy Dawita Wondwosenaana kaaliyaa E.mail adraashshaaninne silkke payduwaan giigisuwaa immana dandayettees.*

*This Wolaitic version of Adventist fundamental beliefs is translated by **Wondwosen Dawit**. Please use [kurki777@gmail.com](mailto:kurki777@gmail.com) , +251916482300 for comments. As final version is expected very soon, please send your comments and corrections as soon as possible.*